

**「香港工程師週 2023」
香港工程師學會單車及跑步籌款活動
會長卜國明工程師 演講辭
2023 年 3 月 11 日 (星期六)**

林世雄局長、各位工程界的「精英運動員」，以及各位工程師們的親朋好友，大家好！大家上星期有冇去西九參加我哋個嘉年華啊？開心嗎？想唔想再搞啊？好！多謝大家意見！我哋會綜合考慮！好了！

今天在這個風和日麗的早上，非常高興可以跟各位一同參與「香港工程師週 2023」的壓軸項目，「香港工程師學會單車及跑步籌款活動」，這是一項既有益身心又有意義的活動，除了是業界共同參與的一項盛事，亦都是一個籌款項目，為的正是培育下一代工程專才，為着我們工程業界以及香港未來的發展。

相信大家都知道，今次「香港工程師週 2023」嘅舉辦，係配合學會今年的主題「以工程師為傲」，除了幫助提升工程師嘅形象，幫助學會提升作為業界代表的形象外，亦希望各位會員都以身為專業工程師感到自豪，一同培育有抱負的年輕人加入專業工程師行列，在未來承傳工程專業對香港城市發展的重要角色。

今日響呢度，有這麼多位工程專業界人士及親朋好友們參加跑步踩單車，除了宣傳工程專業之外，更加是一個連繫親朋好友的難得機會。所以大家來到「將軍澳跨灣大橋」這一座又係由我哋專業創新嘅工程師，首次用 690 鋼鐵打造嘅標誌性大橋建築物，大家記得跑步同踩單車之餘，都不要忘記同身邊的親友一起好好欣賞如斯美景，享受微風吹送的寫意周末。好好記住我在上星期嘉年華 TED Talks 分享過幾句「欣賞香港、珍惜香港、共建美麗快樂香港」！

最後，特別希望邀請各位運動員跑完步及踩單車之後，一同出席參與閉幕典禮，屆時將會是一齊見證香港工程師週 2023 圓滿舉行，並共同合照留下美好回憶。

事不宜遲，一陣鳴槍聲響起，各位運動員正式出發，謹代表香港工程師學會上下，再次感謝大家的支持和參與，預祝大家一會兒有個開心好玩、難忘愉快的早上。

接下來我們十分榮幸，邀請到林世雄局長同我們分享，有請世雄局長。

香港工程師學會
會長卜國明工程師